

Sumiiffimmi innuttaasunut nunallu allanit takornarianut katsorsaanissamut pisussaataaaffiit eqqortinniarlugit, piffissami takornarissat angalanerpaaffianni, nunatsinni peqqinnissaqarfimmi sullissinermi ikiortinnissaq pillugu pisortatigoortumik isumaqatigiissuteqarnissaq siunertaralugu, Peqqinnissamik Suliniaqatigiiffik, WHO, attavigineqarnissaanut Naalakkerusisut saqqummiussinissamik peqquneqarnissaat pillugu Inatsisartunut aalajangiiffisassatut siunnersuut.

(Inatsisartunut Ilaasortaq Anna Wangenheim, Demokraatit)

Akissuteqaat

(Peqqissutsimut Naalakkersuisoq)

Siullermeerneqarnera

Peqqinnissaqarfimmi sulisoqarniarneq eqqarsaatigalugu, Peqqinnissamik Suliniaqatigiiffik, WHO, ikiuinissaanut siunnersuuteqartumut Anna Wangenheimimut Demokraatineersumut Naalakkersuisut qujapput. Peqqinnissaqarfimmi sulisoqarniarnikkut pitsanngorsaanerit Naalakkersuisunit qitiutinneqangaarput. Taamaattumik peqqinnissaqarfimmi sulisussarsiorneq taakkulu sulisoriinnarnissaanut ukkataqarneq pingaarnertut sammineqarmata, peqqinnissaqarfik pillugu Inatsisartut amerlanerussuteqartut Naalakkersuisunit novembarimi 2023-mi isumaqatigiissuteqarput.

Peqqissutsimut tunngatillugu suleqatigiissutigineqarsinnaasut aalajangersimasut arlaqartut nassuiarneqarlutik, Naalakkersuisut WHO-lu akornanni paaseqatigiinnissamik ulloq 1. juli 2024-mi isumaqatigiissusiortoqarpoq (MoU). Ilaatigut peqqinnissaqarfimmi sulisussarsiornerup taakkulu sulisoriinnarnissaanut tunngasunik isumaqatigiissusiortoqarluni.

Isumaqatigiissut, MoU, atuutilerneraniit nunat tamalaat akornannit sulisussarsiornerup peqqissutsimullu tunngasunik ilinniartitaanerup pilersarusiorneqarnissaanik Naalakkersuisunit WHO-miillu suliata aallartinneqarput. Suliassaqarfii taakku marluk peqqinnissaq pillugu isumaqatigiissummi qitiutinneqarput. Taamaattumik piffissaq qaninnerusoq ungasinnerusorlu eqqarsaatigalugit nunatsinni peqqinnissaqarfimmi sulisoqarnermut pitsanngorsaaqataanermut suliniutini pingaarutilinni WHO-mit peqataasoqalereerpoq.

Paatsoorneqarsinnaasut pinngitsoortinniarlugit, pisuni aalajangersimasuni peqqinnissaqarfimmi sullissisutut akisussaaffeqartunik, WHO kattuffittut atorfinittaqannginnera oqaatigissallugu pingaaruteqarpoq. Taarsiullugu ilaatigut innersuussutinik, suliniutinut nassuiaatinik peqqinnissaqarfimmilu sulisoqarnermi pilersarusiornerup aamma naleqqussaanerup iluani periutsinik immikkut ilisimasanik WHO-mit tapertaasoqassaaq.

Aammattaq Nunatsinni Nakorsaaneqarfiup sammisaq pillugu 1. maj 2024-mi nalunaarusiaa naapertorlugu, peqqinnissaqarfimmut taamaallaat piffik aalajangersimasoq takornariartitsinermiit artukkerneqartartoq oqaatigissallugu naleqquppoq. Tamakkununnigali tunngasut siunissami matumani allannguutaasinnaasut Naalakkersuisuniit malinnaaffigineqarput.

Qulaani pineqartut tunngavigalugit, WHO-mit suleqateqarnerup aallartinneqareersup saniatigut, allatigut sulisoqarnermut tunngatillugu ikiorneqarnissamik isumaqatigiissusiortoqarnissaanik pisariaqartitsisoqanngitsoq, Naalakkersuisunit nalilerneqarpoq. Siunnersuutip itigartitsissutigineqarnissaa Naalakkersuisunit inassutigineqarpoq.